



Tiel program dil camp da stad per affons e tgauns ha era ina viseta tier igl allevatur da labradors, Pirmin Lozza a Mustér, giu liug.



Clau Maissen (sen.) ha declarau la differenza da divers urdeins d'apportar.

FOTOS MAD

JuHu a Segnas en febra da catscha

Per la quarta ga ha il camp per affons e tgauns giu liug a Segnas

DA SUSI ROTHMUND / ANR

■ Igl ei gia stau la quarta ga che Segnas ei semidau duront in' jamna da stad en in vitget cun in tschuat affons, giuventetgna e tgauns. Aschia era dils 21-27 da fenadur, cu 26 buobas e buobs han gudiu in program divertent e variont el camp che steva sut il motto «febra da catscha». El center dil camp per affons e tgauns da «Jugend und Hund» ch'ei dat dapi 1998, schai oravontut il plascher, mo ils numerus e zun motivai menaders dattan era vinavon lur vasta savida per luvrar culs tgauns che valan sco ils accumuladers ils pli fideivels dils carstgauns. Dapi igl emprem camp – che ha da lezzas uras giu liug a Sörenberg – ei Sandra Altorfer, ina menadra ed organisatura dils

camp. Tiel team da 18 menadras e menaders s'auda dapi onns era sia feglia Maya che ha – sco ses collegas – immens plascher da luvrar culs affons e lur tgauns. Tenor Altorfer ei la casa a Segnas ordvart adattada per in tal camp ed ei ha avunda spazi per carstgauns ed animals. Culs onns ein era ils possessurs da tgauns ella regiun vegni attents al camp per affons e tgauns, ed Altorfer ha giu plascher che treis dils 26 participonts ein vegni dalla regiun. La filosofia dils menaders ei da sustener il commerci local ed aschia ein tuttas cumpras pil camp vegnidat fatgas a Segnas e Mustér.

Giugs – divertiment – trenament

El camp a Segnas han ils affons saviu guder in program ordvart variont ed ei

ha dau occurrenzas nua ch'ei han priu part cun lur tgauns ed era entginas ch'ei han gudiu senz'il tgaun.

Sper giugs e divertiment han ei profitau da dabia trenament sportiv culs tgauns. Gudiu han ils participonts dil camp a Segnas era l'excursiun d'in di che ha menau els cul tren sil pass dall'Alpsu e da leu vinavon a pei entochen sil Lai da Tuma ni engiuviars a Tschamut e puspei cul tren anavos a Segnas.

Tenor Altorfer ei gia il viadi cun tren sil pass staus ina pulita sfida. Sco ella ha declarau, attira in tren occupaus cun biebein 40 teams cun tgaun dabia attenziun. Tscheu e leu seigi denton era stau d'udir in laud che hagi fatg bein.

Cun catschadurs sils fastitgs

A caschun dil percuors da «Canin Cross» che ha menau ils teams da Bugnei a Segnas, han ils affons ils pli sperts cun lur tgauns saviu sequalificar pil campiunadi svizzer. Denter els ei era la participonta Aurora Langhi da Glion sequalificada, la giuvna ha gia priu part pliras ga al campiunadi svizzer da «Canin Cross». In punct culimont dil camp ei tenor Altorfer la viseta dils catschadurs Remo Giger e Clau Maissen stada. Giger ha introduciu ils affons els fatgs dils tgauns da catscha ed el ha era rispundi in tschuat damondas avon ch'els affons han astgau suandar siu beagle Nanuka che ha encuretgi il fastitgs da saung. Fastitgs ch'eran vegni mess gia igl avonmiezdi. La ruta culs fastitgs da saung ha simulau igl ani-

mal blessau che ha sin sia fuigia schau anavos il fastitgs. Il spaniel da Münster da Maissen ha allura mussau co el anfla il fastitgs d'ina runada. Ton affons sco menaders ein stai dil meini che la demonstraziun arisguard il tgauns da catscha seigi stada in grond enrihament chinologic pil camp da stad. Pils fans da labradors ei secapescha la viseta tiels allevatur Lozza a Mustér stada ina grond'aventura, leu han ei numnadamein astgau struclar e carsinar il cagneuls. Il proxim camp per affons e tgauns ha liug dils 19-25 da fenadur 2020 a Segnas.

Informaziuns: Ulteriuras informaziuns ein d'anflar sin la pagina d'internet www.jugend-hund.ch nua ch'ins sa era s'annunziar pil proxim camp.



Plein attenziun teidlan ils affons quei che Remo Giger declara davart il tgauns da saung e lur lavur.



Cun Capper tegn Lucie sezza ina razza da tgauns da catscha.



Selina da Dardin cun siu tgaun Diva han gudiu il program variont dil camp per affons e tgauns.



Remo Giger cun siu tgaun da catscha Nanuka han visitau il camp a Segnas.